

COMUNICATO n. 855 del 19/04/2024

Traduzione in cimbrio

Prais Djunge Näsüachar Euregio 2024, ma makse kandidàrn übar in tèma vodar khünstliche Intelligentz

[Cimbrio] “Khünstliche Intelligentz in Euregio” disar iz dar tèma von Prais Djunge Näsüachar Euregio 2024, boda iz gerift afta 13[^] editziong un iz augehaltet von händln Khämmarn von Trentino, Südtiról un Tiról.

Di djungen näsüachar von drai lentar soin gerüaft innzogeba vor atz 15 von madjo khurtz geschribet atz inglés soine näsüach, ma mochtz tüan pittnan formulàr boma vennt online. Di arbatn mochan soin übar bichtschaft, bizzschaft, rècht, istrutzióng, mentschliche bizzschaft, tèknesche bizzschaft, natùral bizzschaft un übar dar meditzìn. A hoacha djurì, vorsitzt von vorsitzar vodar Frai Universitét vo Poatzan bart zornìrn di pestn prodjèkte un di djungen näsüachar boda soin khent zornìrt bartn khemmen gerüaft in di tang 17 un 18 von snitt boda khint, in di Tang von Tiról un von européan Forum vo Alpbach, zo zoaga soi arbat, zo reda pitt gekhennate bizzschaftege un pinn vortretar von istitutzióngen.

’Z mangse kandidàrn djunge näsüachar boda hãm mindar baz 35 djar (gebortet vor atz 16 von snitt 1969) boda arbatn vor di universitét, obarschualn un näsüach institüt von Euregio odar boda arbatn vor di universitét, obarschualn un näsüach institüt vodar gântzan bèlt, ma boda khemmen von Euregio.

Vor in vorsitzar von Euregio un vodar autonome Provìntz vo Poatzan dar Prais Djunge Näsüachar Euregio iz sa sèlbart a bichtegar zil vor in Euregio Tiról-Südtiról-Trentino: schupfan di djungen z’arbata in an sektór, dar sèll vodar näsüach grüntlich vor di djar boda khemmen, haltante kunt ke übar dise argoméntn ünsarne lentar arbatn drau sidar ettlana zait. Darzuar dar tèma boda di djungen näsüachar soin gerüaft z’zoaga baz da soin guat zo tüana, da khünstliche intelligentz, macht disan prais no mearar interesànt un bichte.

Vor in vorsitzar vodar autonome Provìntz vo Tria dar Prais iz a groaza oportunitét vor di djungen näsüachar, di arbat vo disan djunge helft starch zo venna näüge solutzióngen vor di sbern prüf boda ünsarne lentar bartnen vennen vür.

Schupfan zo redase un auzzobèkslanen bazma khânt ummaz pinn àndar übar di grentzan iz sichar an modo zo konkretizara bazta iz khent vorgelekk in okasióng von G7 bodase iz gehaltet vor bintsche zait ka Tria pròpio übar in tèma vodar khünstliche intelligentz, asó hoffe azza soin vil di djungen interesàrt zo nemma toal disarn näüng editziong.

Vor in vorsitzar von Lânt Tiról da khünstliche innteligentz macht kuriositét un gevallt in laüt, ma in da gelaichege zait machtze di vort o. Da soin bintsche di sachandarn boda hãm oportunitét un perikole asó nãmpe azpe in da KI. Di tèknolodjì iz nia vürgànt asó bahémme azpe in disan kaso.

Pinn Prais Djunge Näsüachar Euregio 2024 bölltma machan khennen di djungen näsüachar boda arbatn garade afte khünstliche intelligentz. Da KI mocht no khemmen auzgebetart, klasifikàrt un analizart vodar

bizzschaft, zo maga zuargem in politike zo vestega regln un ort. Ma rüaft asó alle di sèlln boda soin interesàrt innzogeba soine arbatn aftz disan tèma vodar KI. Di toalnemmar durch in Prais Djunge Nàsüachar mang gem soin bichtege schützt in gântz Euregio un hãm oportunitét zo reda übar dise teme pitt bichtege bizzschafter.

Dar vorsitzar vodar händl Khåmmar vo Poatzan gedenkht ke di bichtschaft gianat nèt vür åna nàsüach, ombrómm di nàsüach iz dar grunt von naüing idee, tèknolodjïan un stratedjïan. Di nàsüach iz nèt lai vor disa zait ma di helft zo macha vürgian di gesèllschaft. Vor di händl Khåmmar dar prais Djunge Nàsüachar Euregio iz an oportunitét auzohalta disan bichtegen protzèss boda macht krescham un bill darzuar merchan bia allz ditza iz bichte.

Dar vorsitzar vodar händl Khåmmar vo Tria hatt untarstricht bia di djungen nàsüachar pitt soinar kuriositét, zèchhait un kompeténtz, soin di kraft vodar vornaügarom un vodar bèkslom. Vor daz sèll, Azpe istitutziongen un untarnemmar mochtmen gem an groazan schützt un auhaltmse zoa azza mang zoan an pestn daz sèll bosa soin guat zo tüana. Vor daz sèll dar Prais Djunge Nàsüachar Euregio iz a bichtega okasiong zo macha starche pintom zbisnen dar bèlt vodar nàsüach un da sèll vodar arbat in a kornis transnatzional boda schützt un gitt vèrt un macht khennen di sachandarn boda di djungen nàsüachar khånen tüan.

Vor di vorsitzaren vodar händl Khåmmar von Tiról, boda hofft aztada soin vil toalnemmar, iz bichte vürvüarn di vornaügarom un di nàsüach in Euregio Tiró-Südtiról-Trentino ainfach ombrómm di vornaügarom machtaz starch. Di händl Khåmmar von Tiról schützt di untarnemmar aft soin bege zo venna hërta naüige solutziongen. Vor daz sèll izta mångl azta dar Prais Djunge Nàsüachar mage zuargem daz djust maz gèlt in sèlln boden gebinnen.

Di informatziongen aftn båndo venntmase afte websait:

<https://www.euoparegion.info/it/euregio/progetti/scienza/premio-giovani-ricercatori-euregio/>

Aftz disan link dar formulàr online zo nemma toal: <https://forms.office.com/e/USyk9nGLEi>

In finalistn barten khemmen gezalt dar viazo un di herbege vor zboa nècht atz Alpbach.

No åndre informatziongen mang khemmen gevorst in toal Àmt von Euregio Tiról-Südtiról, Trentino riferimént Jasmin Penz (tel. +43 512 5082355; jasmin.penz@euregio.info).

Übarsetzt von Schaltarle vor di zung von Toalkamou vodar Zimbar Hoachebene

(cdt)